



Bájkkeavijssa NuorttaSálto

SANKS ålgus Divtasvuonas?

■ SANKSa (Samisk nasjonalt kompetansesenter - psykisk helsevern) addneláhko ja bagádallamdievno li lassánam dan ájgen gå le læhkám guovllokontávrrá Divtasvuonan. Huoman soajttá ádájagij maŋŋela hiejtduvvá.

Ganugi kontávrrálgjo máksema Margits Minnen ádájakmánno 1. biejes ja prosjækta læhpáduvvá. Moattes julevsámijis báhtsi, dárbujn jur dájs fálddagájs.

Pasiænntavuosedibme juohkka SANKSa ássudagájda Finnmárko álggolin le laseduvvam. Dárbo bagádallamis ja áhpádimis le sierraláhkáj lassánam ja ienep almulasj instánsa li SANKSaj guládallam aktisasjburgo hárráj. Divtasvuona suohkanijn li ásadam aktisasjsjiehtadallamav ja skávllá dárbov vuojná.

- Divtasvuona ássudahka le ássudagájs gánná li læhkám binnemus hásstalusá. Geografalattjat le gájka tjoahken. Álla ietjá suohkana jalí tjehppevarresvuodadievnuastusá gejna vierttip vieldit. Dan diehti le læhkám álkke aktisattjat barggat juohkka dásen. Stuurámus hásstalus le gå dárbo dievnastusájs le lássánam, ja dan diehti e bargge nagá gátsedit divna gatjálvisájt. Danen lip vuojnám dárbov ressursajt duoddit jus galggap dárbov gátsedit, tjuovggit prosjæktajádediddje Tone Amundsen (ávddála Finnesen).

Pasiænntaláhko lassán

Sivva ganugahttemij le ekonomalasj ressursa. Helse Nord ja Helse Finnmark æbá le juollodum rudájt joarkka doajmmaj. Le læhkám guovllokontávrrá Divtasvuonan gálmma jage ja dalloj le SANKSa ruhtavuorkká prosjevtav dárjudam. Ulmme Divtasvuona, Snása ja Oslo kontávrrájn le ávddánahttet avtaárvulasj fálddagáv psyhkalasj varresvuodasuodjalimen sámijda vuonarijkan. Dálátjij vuojnnet li dájna vuorbástuvvam. Diededibme duola dagu Ájluovta skávlás vuoset le ájbas dárbo SANKSas Divtasvuonan.

Háldadusoajvve Divtasvuona suohkanin vuoset aktisasjburgoádstibmáj, mij gájbet avtaárvulasj varresvuoda- ja huksofálddagáv sámijda, dættot dárbov nannistam SANKSas.

- Divtasvuona kontávrráj le tjanádum álles fáhkavirgge ja aktisasj nasjonalalasj fáhkajuogos mij laviehkadam klinihkalasj bargujn, bagádallamijn ja áhpáduasáj. Lågo ma gulluji dájmalasj pasientajda gudi árru dábalasj sisválldemguovlo álggolin, li lassánam juohkka ássudagán, javlla Amundsen.

Lassánibme le sierraláhkáj stuurre mánná- ja nuorrapsykiatrian (BUP) ja Divtasvuona suohkan le suohkanij Finnmárko álggolin gánná le stuurámus pasienntaláhko ma ávkástalli SANKS-BUP fálddagájs, ja lågo li árrom

stuoovása álles prosjæktaájgen. Állesjattuk pasienntaláhko le aj lassánam ja Divtasvuona suohkanin le stuurámus pasienntaláhko SANKSan Finnmárko álggolin.

Boahteájjgásasj organiserim

SANKS li aktisasjsjiehtadallamav áttjudam Salten DPSaj, Nordlánda skihppijviesujn ja Divtasvuona suohkanijn. Li aj oassálasstám prosjevtan «kultuvrragasskasasj varresvuodaguovdásj» aktan Divtasvuona suohkanijn ja aj aktisattjat barggi Valnesfjorda Varresvuodavalástallamguovdátjijn. SANKS lij ressursajuohkusin prosjevtan «Sámij luonndomáhtudaha ressursan buorep varresvuohatj ja iellemkvalitehttaj».

- Vuojnunagi hiebadibme terapautaj sáme kultuvrramáhtudagáj li sámijt oatsodum viehkev átsájtj ja fálddagáv ávkástalátj. Vuosstebiellen li bargge diededam sijan le ilá állo barggo ja la hásstalus aktu barggat. Danen vierttip árvustallat ádá organiserimav, subtsas Amundsen. Sån ájggu modellav gánná nanni fágalasjuodav ja jasskavuodav guovllokontávrrájn. Dáhkki dav ásadit jus li guovtes juohkka kontávrrán. Aktisasjburgo suohkanvarresvuodadievno ja sierravarresvuodadievno baktu le ráddidusá avtastallamádstusá milta.

- Vuojnnep addneláhko le lassánam ja vuojnnep aj gå lip vuojnusin addnijda ja varresvuodabarggijda de le álkkep mijás viehkev gatjádít. Miján le ájbas hállo joarkket, javlla Tone Amundsen.

Valla vuostasj viertti ruhtadibme áttjuduvvat.

«Diededibme Ájluovta skávlás le mij vuojnnep ájbas dárbov SANKSas Divtasvuonan»

« Gullam lip tjehpes lågádallijt nanos máhtudagáj. Le midjij vaddám muhtem mærráj «dádjadimev» ja lip «oahpásmuvvam» sáme kultuvrajn ja le midjij aj vaddám dádjadimev gáktu dárbahip ienep máhtudagáv dán birra vaj galggap máhttet buorre dievno sámijda fállat.»

Ij la stuooves fáhkavirgge Divtasvuonan.

Prosjæktajádediddje Tone Amundsen dárbov vuojnna SANKSa joarkká guovllokontávrrá Divtasvuonan ja ádá láhkáj organiseriduvvá guokta barggij. Valla ádájakmánno 1. biejes gannuduvvá lájggimsjiehtadus Margits Minnejn Ájluovtan ja báddásattjat ij le ruhtadibme joarkátjít dájma.

Ingen fast fagstilling i Tysfjord. Prosjektleder Tone Amundsen ser behovet for at SANKS fortsatt har regionkontor i Tysfjord og omorganiseres med to ansatte. Men fra 1. januar er leieavtalen på kontorlokalene ved Margits Minne på Drag sagt opp og foreløpig er det ikke midler til videre drift.

Tæksta: Kitty Skapalen
Járggálibme: Divte Media AS

